

üses Frühlingskonzärt 2019

Eh, wi geit doch d Zyt verbi – das ghört me doch immer wider. S'het aber ou es Chörndli Warheit dranne.... u so chunts das mier itz scho ir Vergangheitsform vo üsem Frühlingskonzärt verzelle....

Mier hei am Wuchenändi vom 27. u 28. April 2019 üses Konzärt ume ir Merzwäckhaue ds Ämmeschache Lützelflüeh dörfe düre führe. S'isch gäbig dörfe mier dort si, viu wo mier bruche wi Chuchi, Bühni etc. isch vorhande und fix igrichtet.

Am Samschti si mer widder üsne Erwartige chli turbulänter gstartet aus dänkt. Üse Gaschtklub het üs churzfrischitg wäge Chrankheit müesse absäge. Mier si due auso scho chli ist tribble cho. Ömu dr Ädu u i hei scho fasch chli Bluet u Wasser gschwitzt... afe si mer närvös gsi vor üsem erschte Konzärt mit de Schafhüseler u mier hei dörfe asäge (öppis wo mier no nie gmacht hei). Aber mir si ja flexibu u nach chli Umtischele u Närve bruige si mer due zwäg gsi.

Eröffnet het dä Abe ds Schwyzerorgeliquartett Brandis mit ihrne Stück. Viele Dank a dere Stell für Ihre Uftritt u ihri Ungerhaltig. Aschliessend si mier dra cho u hei due haut chli meh gsunge aus vorgseh. S het aui breicht aber üsi Dirigänti, d Rita bau am meischte. Mit gnue flüssigem für d Stimm u Humor het si das tip top gmeischeret. Zum Isatz cho isch o üses Duet Helene u Rita sowie d Chlinformation mit dr Rita, Brigitte, Annekäthi, Claudia, Ändu u Winu. Si aui hei ou flissig güebt u em Publikum schöni Biträg vortrage.

Am Sundimorge isch es bi üs ume losgange. Zersch mit ufrume u zwäg mache – das ghört haut o drzue. Gli scho si na dis na di erschte Bsuecher itroffe u «Gott sei Dank» die erschte Jodler vom Gaschtklub Frohsinn Lanzenhäusern. Uhhhh, wi hei mier Fröid gha! So het auso üses zwöite Konzärt nach Programm mit de Örgelischüeler vo Sumiswald chöne starte. O da es härzlechs Danke für die lüpfigi u zakig gspilti Ungerhaltig. Mit chli weniger Biträg vo üs drfür meh Witze u Biträg sitens Gaschtklub isch dä Sundinamittag ruhig u gsittet vonstatte gange.

Nachem zwöite Konzärt isch es gli druf losgange mit ufrume. We aui enang häufe geit das aber guet u ca. am 19.00h hei die Meischte chöne Fyrabe mache. Mier dörfe ufnes glungnigs Konzärtwuchenändi zrüg luege mit viune Bsuecher, schöne Rückmäldige u emne guete Gfüehl.

Ig danke aune Mitschafhüseler/-inne, de Bsucher/-inne, Gaschtformation u natürlich üse Häufer. Merci viu viu mau heit ier üs so fescht gholfe u üs Sänger/-inne ermüglecht zwüschen inn ou e Momänt bi üsne Liebschte u Fründe ds höckle u ds gniesse.

Mier fröie üs ufne gueti Jodlersaison u hoffe ufnes erfolgrichs Konzärt ou im 2020.